

畿輔安瀾志

臣
王履泰恭纂

薊運河卷下

隄防

薊運河隄

〔畿輔通志〕薊運河隄河源高派繁河形曲折每風發漲溢潰決隄岸淹沒田廬而寶坻地勢最下受害尤劇雍正四年怡賢親王奏請築隄自三河縣之料馬莊迄於寶坻縣之江溝口長一百八十餘里又於隄

內地窪西北一帶村莊雨潦停積各妨耕稼委舊令程璇相度於魯沽莊建石閘一座長亭莊建涵洞一座於張頭窩建涵洞一座潮汐通流民間得以汲飲兼資灌溉雨水過多則洩而出之

〔薊州志〕沽河東

岸自汪家新莊起至婁家莊止共二萬四千一百三十六丈西岸自五里莊至大全莊止共一萬二千七十丈

謹案河隄東岸起西河套六里至激流店十二里至皮家屯八里至上倉十二里至楊津莊三里至王家

淺十五里至康水莊五里至下倉六里至白龍港十
二里至少林口五里至安安莊十八里至新安鎮十
七里至小河口長一百九十里西岸起蔡家莊八里
至澱家店七里至窩頭十五里至赤安莊五里至上
倉五里至消流四里至程子口八里至老曲莊五里
至康各莊四里至白塢十五里至嘴頭十里至三岔
口二十里至侯家營十二里至橋頭十四里至李家
新莊長一百三十里又自白塢十八里至秦家莊係
山水歸河之道無隄埝乾隆十一年又築隄以捍之

激流河隄明宣德九年築

明實錄宣宗宣德九年六月築薊州之激流黃蠟錫等處隄岸

三岔口隄明萬厯間寶坻知縣丁應詔袁黃相繼修築柳子口隄明萬厯六年築

〔明甘肅學修河隄記〕畧萬厯五年秋大水柳子口河四野泛流不能引注於海西南畝盡蒿葦民不能收一麥一粟民亦自以爲慮請各照畝出夫願有司者董其工漕之隄新築七十五里補舊塌一百二十五

里築決口六十五所計一十四里共二百十四里新
河因地勢污下剝濬之自柳子口至嘴頭共二十五
里復與漕渠會流同注於海自四月三日載事屆五
月十五日止四旬日漕渠新河成豈獨民耕耨西南
畝無逋租享千百世之利漕餉尤永賴之然獨修固
難兼修尤難分築固未易分嗣而修之尤未易遂區
而析之曰州民劉忠彥等四十五戶所築隄若干丈
吳守奉黃安等七百四戶新開戶若干步宋守棟李
天欽等四百二十戶取領荒地若干頃畝各給以印

帖此河此帖期與西南民世世守之若堤圯河塞世
世修之而其所領地得世業焉必不使鄰者侵強者
奪姦者混守望有舍巡緝有人青甸之橋亦藉民力
以成區畫垂久百代不磨則俱在州守方冊中監司
辛公名應龍山東安邱人薊守蔣公名士南直宜興
人其他與勞委官并民工以夫赴役者例得書其名
於碑陰云

潮河隄起寶坻縣北金陵口迄縣東南江潢口長二百
餘里雍正四年築

寶坻縣令洪肇榘潮河堤說畧寶坻之潮河隄匪一日矣考其形勢自縣西北金陵口抵縣東南江潢口二百餘里久爲寶坻障蔽歲時修築雖洪濤奄至以隄完可恃是以歲歲登稔民受其利雍正二年大水明年於潮河舊隄募夫修築裁灣取直加高培厚起新集料馬莊止張頭窩長一百八十里又開鮑邱窩頭河二道以洩境內之水八年奉

旨開青龍灣引河自香河至寶坻之楊家場入境直於甯河之甯車沽計長九十里其長隄遙壩則周圍凡四十里

許且於繡針口開支河一道至八門城止以洩瀝水
自是以來東西北三面皆濱河繞以長隄外水俱不
入其境內積水復有支河數道以資宣洩斥鹵之地
頓成膏腴矣

以上正河隄

紫金汧隄

〔荊州志〕遼運河西岸隄埵自東迷王會至口頭莊止
長二千三百四十丈

〔謹案〕紫金汧隄四十里至小漫河二十里至蒙圈十

里至太河莊六里至迷王會六里至婁家莊十五里
至小河口長九十一里

洵河隄東岸自金水屯起接三河縣交界至三汭口止
西岸自三河縣新集起至寶坻縣寬江止

〔謹案〕洵河長隄長一萬八百二十六丈見薊州志西
岸自新集至寬江計長一百三十里名曰

欽隄雍正四年築乾隆十一年於新安鎮西添築月隄一
道長二百四十丈高一丈頂寬一丈底寬三丈又培
築大沽隄一段長五百七十丈高七尺頂寬七尺底

寬三丈灘沽隄一段長五百二十丈芝麻窩隄一段
長一千五百丈高寬丈尺並同

紅心隄

〔名勝志〕在寶坻縣東南二百里秦始皇所築潮水雖
湧而隄不沒

工部地隄在寶坻縣東南康熙間邑人大學士杜立德
修築

還鄉河民埧起張官屯至趙官莊岔口止長五十五里
高八尺至一丈五六尺頂寬八尺至一丈二三尺底寬

三四丈不等

〔謹案〕雍正五年六月還鄉河隄岸沖決附近之田禾廬舍有被淹浸經怡賢親王奏報

命散秩大臣常明率同御史勒音特錢兆元前往悉心查勘並賜帑金二萬兩賑卹灾黎復

諭若有動用倉穀之處將本縣倉穀卽行動用〔又案〕乾隆十

一年於豐潤縣西南還鄉沙流二河合入玉田縣南境東岸王六庵西岸許家庵周家灣三處建築月隄共長七百十六丈

小泉河隄在玉田縣劉家橋舊以防小泉山孟家光砂三泉之泛漲高三四尺寬八九尺

〔玉田縣志〕三泉匯集西水一泛劉家橋一帶最爲緊要劉家橋城南二十里

錢家溝民埵在玉田縣境溝西又疊埵以障水高二三尺

小泉山馬家營閘

〔玉田縣志〕度水灌田

藍泉水曲河頭閘

〔玉田縣志〕雍正四年築度水灌田

涼水草壩在玉田縣南許家菓園廠兒莊二處乾隆十一年建二十年查明二壩久經朽爛無庸修理

玉石塘

〔盤山志〕盧家峪一帶長十里康熙中開

蓮塘

〔畿輔通志〕在玉田縣北里許講武臺後

七里莊明口在寶坻縣西南雍正八年築以防窩頭河之水

寶坻縣令程璇七里莊明口記畧寶坻縣居香河縣下流窩頭河水經香河七里莊入界向因河淤塞每遇水漲爲寶邑患歷有年所雍正四年

皇上興修水利命王大臣指示疏通水得順流歸海惟七里莊舊有明口一道承修者曾議堵築因香民以有損於彼而止七年伏秋汎發水由河道下者十居三由明口漫溢寶邑者十居七縣北村莊悉被淹沒經總督委查而香民仍執前說堵築不行八年五月會京東局有明口亟宜堵築之請令璇司其工六月二十一

日興工越七日告成秋汛水汜遂資捍禦寶坻縣北
俱登豐稔而香河亦獲有年

黑狼口隄

寶坻縣志海濱鄉居仁里正南黑狼口者亦巨鎮也
正南三十里

魯沽莊石閘在寶坻縣雍正四年建

寶坻縣令程璇閘工完竣議畧竊查承造魯沽莊閘
座前委北運河同知勘詳請改建木涵洞正在料估
隨據莊民谷守信等具呈咸稱建閘原以外防河漲

內消田澇且關係數十莊居民汲引養生若改建木
工易於沖決朽爛歲修未有底止請仍建石工以垂
永久因時屆仲夏伏汎伊邇若候文移往返有悞民
間田舍隨於本年五月初四日興工於六月初五日
告竣再查寶坻長隄自三河縣埵頭起至魯沽莊止
約計不下二百餘里隄內積水皆從魯沽莊道出口
歸入大河今內外水勢相持尙未起閘將來外河水
退隄內眾水會歸出口藉此一閘尙恐宣洩遲緩若
改建涵洞更難流通是魯沽之宜建石閘而不宜涵